

## **Pas Pol i raitim long Ol Efesus Tok i go pas**

As tingting bilong dispela pas i olsem, God i laik bungim olgeta samting long Krai, em olgeta samting bilong heven na bilong graun, na bai Krai i stap het tru bilong olgeta samting (1.10). Na God i laik kirapim ol manmeri bilong em yet, bai ol i pas tru wantaim Krai na ol i stap wanbel.

Long namba wan hap bilong pas Pol i mekim planti tok long marimari bilong God i mekim olgeta manmeri i bilip long Krai i bung wantaim na i kamap wanpela lain manmeri. Long wok bilong Jisas, God i kisim bek ol manmeri, na em i givim Holi Spirit long ol olsem mak bilong em bai i mekim olgeta gutpela samting long ol olsem em i bin promis (1.14). Long namba 2 hap bilong pas Pol i tok olsem ol Kristen i pas wantaim Krai, olsem na ol i mas wanbel tru na bihainim ol pasin bilong God yet.

Long dispela pas Pol i save mekim ol tok piksa bilong soim ol manmeri klia olsem ol i pas wantaim Krai na ol i kamap wanpela lain manmeri. Em i tok olsem ol manmeri bilong God i olsem wanpela bodi na Krai i olsem het bilong dispela bodi (4.1-16). Na tu, ol manmeri bilong God i olsem wanpela haus na Krai em i namba wan pos bilong haus (2.19-22). Na ol manmeri bilong God i olsem wanpela meri na Krai i olsem man bilong dispela meri (5.22-32). Long dispela pas yumi save

lukim gut tru ol gutpela samting God i laik mekim long ol manmeri bilong en.

## **Long Krai God i mekim yumi i kamap ol nupela manmeri**

*(Sapta 1-3)*

<sup>1</sup> Mi Pol, mi aposel bilong Krai Jisas. Long laik bilong em yet God i makim mi olsem aposel. Mi raitim dispela pas long yupela ol manmeri bilong God i stap long taun Efesus na i bihainim tru Krai Jisas. <sup>2</sup> God Papa bilong yumi, wantaim Bikpela Jisas Krai, i ken marimari long yupela na mekim bel bilong yupela i stap isi.

*Long Krai God i givim yumi olgeta gutpela samting bilong heven*

<sup>3</sup> Yumi litimapim nem bilong God, em i God na Papa bilong Bikpela bilong yumi Jisas Krai. Long Krai em i bin givim yumi olgeta gutpela samting bilong heven, bilong helpim spirit bilong yumi. <sup>4</sup> Taim God i no mekim graun i kamap yet, na em i makim yumi pinis long pas wantaim Krai, bai yumi ken i stap holi. Bai yumi ken i stap stretpela manmeri na i no gat asua long ai bilong en. <sup>5</sup> Bipo yet em i laikim yumi tumas, na em i makim yumi bilong kamap pikinini bilong em yet long wok Jisas Krai bai i mekim bilong kisim bek yumi. Long laik bilong em yet God i mekim olsem. <sup>6</sup> Long

---

**1:1:** Ap 18.19-21, 19.1, Ro 1.1, 1.7, 1 Ko 1.1, Kl 1.1    **1:2:** 2 Ko 1.2, Ga 1.3, Kl 1.2, Ta 1.4    **1:3:** Ef 2.6    **1:4:** Jo 15.16, 17.24, Ro 8.28, Ef 5.27, Kl 1.22, 2 Te 2.13, 2 Ti 1.9, Je 2.5, 1 Pi 2.20    **1:5:** Jo 1.12, Ro 8.29-30, 2 Ko 6.18, Ga 4.5

nem bilong dispela Pikinini em i laikim tumas, God i bin marimari moa yet long yumi. Olsem na yumi mas ting long dispela bikpela marimari bilong em na yumi mas litimapim nem bilong God.

<sup>7</sup>Marimari bilong God em i pulap tru. Krai i dai pinis bilong baim bek yumi, na long blut bilong en, God i lusim olgeta sin bilong yumi. <sup>8</sup>God i kapsaitim marimari bilong en moa yet long yumi, na em i givim olgeta kain save wantaim gutpela tingting long yumi. <sup>9</sup>Bipo God i tingting pinis long dispela samting em i laik mekim long wok bilong Krai. Tasol dispela tingting bilong en i bin i stap hait, na nau em i soim yumi pinis dispela tingting bilong en. <sup>10</sup>Dispela samting em i laik mekim em i olsem. Em i laik stiaim olgeta samting i go i go, na long dispela taim em i makim pinis, em bai i bungim olgeta samting long Krai, ol samting bilong heven na bilong graun tu. Na Krai i ken i stap het bilong olgeta samting.

<sup>11</sup>God i save bihainim laik na tingting bilong em yet na mekim olgeta samting i kamap, na long laik bilong em, bipo yet em i makim mipela Juda bilong pas wantaim Krai na kamap lain manmeri tru bilong God. <sup>12</sup>Mipela Juda, mipela ol namba wan lain i bin bilip long Krai na bihainim em, na God i makim mipela bilong tingting oltaim long bikpela lait na strong bilong em na litimapim nem

---

**1:6:** Mt 3.17, Jo 3.35, Ro 3.24, 5.15, Kl 1.13    **1:7:** Ap 20.28, Ef 2.7, Kl 1.14, 1.20, Hi 9.12, 1 Pi 1.18-19    **1:9:** Ro 16.25, Ef 3.4, 3.9-11, Kl 1.26, 2 Ti 1.9    **1:10:** 1 Ko 3.22-23, Ga 4.4, Fl 2.9-10, Kl 1.16, 1.20, Hi 1.2, 1 Pi 1.20    **1:11:** Ro 8.17, 8.28-29, Kl 1.12, Ta 3.7, Je 2.5, 1 Pi 1.4

bilang em.

<sup>13</sup> Na yupela ol manmeri bilang ol arapela lain, yupela tu i harim pinis tok tru, em dispela gutnius bilang God i kisim bek yupela. Na yupela i bilip pinis long Krai. Olsem na yupela i pas wantaim Krai, na God i bihainim promis em i bin mekim bipo na em i givim Holi Spirit long yupela, olsem mak bilang yupela i stap lain manmeri bilang em stret. <sup>14</sup> Yumi kisim Holi Spirit pinis, olsem na yumi save, bihain yumi bai kisim tu olgeta arapela gutpela samting God i bin promis long givim long ol manmeri bilang en. Yumi wet long kisim ol dispela samting long taim God i kisim bek yumi na yumi stap fri tru wantaim em. Na yumi bai tingting long ol dispela strongpela wok em i bin mekim na yumi bai litimapim biknem bilang en.

*Pol i prea long God i ken givim save long ol Efesus*

<sup>15</sup> Mi harim tok long yupela i bilip tru long Bikpela Jisas, na yupela i save givim bel bilang yupela long olgeta manmeri bilang God. <sup>16</sup> Olsem na taim mi mekim prea, oltaim mi save tingting long yupela na tenkyu long God. Na mi save prea <sup>17</sup>long God bilang Bikpela bilang yumi Jisas Krai, em Papa i stap nambawan tru wantaim bikpela lait na strong bilang en, em i ken givim gutpela tingting long yupela na mekim yupela i save gut long as bilang tok bilang em, bai yupela i ken save gut long em yet. <sup>18</sup> Mi laik bai em i givim

---

**1:13:** 2 Ko 1.22, 6.7, Ef 4.30, Kl 1.4-6    **1:14:** Lu 21.28, Ro 8.23, 2 Ko 1.22, 1 Pi 2.9    **1:15:** Kl 1.4    **1:16:** Fl 1.3-4, Kl 1.3, 1 Te 1.2  
**1:17:** Kl 1.9    **1:18:** Ap 26.18, Ef 2.12, 4.4, Kl 1.12

lait long tingting bilong yupela, bai yupela i ken save gut long ol dispela samting em i singautim yupela bilong kisim, em ol samting yupela i wetim i stap. Olsem bai yupela i save long ol dispela gutpela gutpela samting God i bin makim bilong yumi ol manmeri bilong em. <sup>19</sup> Na bai yupela i ken save olsem, dispela strong bilong God oltaim em i wok long helpim yumi ol manmeri i bilip long em, em i bikpela moa moa yet. Yumi no inap tru long skelim strong bilong en. Na dispela bikpela strong bilong God i save wok long yumi, <sup>20</sup> em tasol bipo i bin wok long Krai. Krai i dai pinis, na long dispela bikpela strong bilong God, God i kirapim em na i bringim em i go sindaun long han sut bilong em long heven. <sup>21</sup> Olsem na Krai i stap antap tru long olgeta kain strongpela spirit, na long olgeta hetman na long olgeta gavman, na long olgeta samting i gat strong. Em i stap antap long olgeta man i gat nem nau long dispela taim, na long taim bihain tu. <sup>22</sup> God i bin putim olgeta samting i stap aninit long Krai, na i mekim em i stap het tru bilong olgeta samting, na long dispela pasin em i stap het bilong sios. <sup>23</sup> Sios em i bodi bilong Krai. Krai em i stap insait long olgeta samting na i pulapim ol tru, na em i pulap olgeta long sios bilong en.

## 2

---

**1:19:** Ef 3.7, Kl 1.11, 1.29, 2.12      **1:20:** Sng 110.1, 2 Ko 13.4, Kl 1.16, 2.10-12, 3.1, Hi 1.3      **1:21:** Ro 8.38, Fl 2.9-10, Kl 2.10, 2.15, Hi 1.4      **1:22:** Sng 8.6, Mt 28.18, Kl 1.18, Hi 2.7      **1:22:** Kl 1.18  
**1:23:** Ro 12.5, Ef 4.10, 4.15, Kl 2.9, 3.11

*God i mekim yumi man i dai pinis i stap laip wantaim Krai*

<sup>1</sup> Bipo yupela i save mekim ol kain kain rong na sin, na dispela i kilim yupela i dai. <sup>2</sup> Long dispela taim yupela i bin wokabaut long pasin nogut bilong dispela graun. Yupela i bin bihainim pasin bilong hetman bilong ol spirit nogut i stap long skai, em dispela strongpela spirit i wok yet insait long bel bilong ol man i save sakim tok bilong God. <sup>3</sup> Bipo yumi olgeta i bin i stap wantaim dispela lain, na yumi bihainim laik nogut bilong olupela bel bilong yumi tasol. Yumi bihainim laik bilong dispela olupela bel na laik bilong tingting bilong yumi yet. Na long taim yumi bin i stap olsem, yumi inap kisim pe nogut God i redim pinis bilong givim long olgeta manmeri i mekim dispela kain pasin.

<sup>4-5</sup> Tru, rong bilong yumi em i kilim yumi na yumi dai pinis. Yumi stap olsem ol man i dai pinis olgeta. Tasol marimari bilong God em i pulap tru na em i givim bel bilong en moa yet long yumi. Olsem na em i mekim yumi i stap laip wantaim Krai. Yes, long marimari bilong God tasol em i kisim bek yupela. <sup>6</sup> Em i kirapim yumi wantaim Krai Jisas. Na em i mekim yumi i sindaun pinis wantaim Krai long sia king bilong en long heven. <sup>7</sup> Long wok bilong Krai Jisas em i mekim dispela gutpela pasin long yumi, long wanem, em i laik

---

**2:1:** Ef 4.18, Kl 1.21    **2:1:** Kl 2.13    **2:2:** Jo 12.31, Ef 5.6, 6.12, Kl 1.21, 3.6-7, Ta 3.3    **2:3:** Ro 5.12, Ga 5.16, Kl 3.6, Ta 3.3, 1 Pi 4.3  
**2:4-5:** Lu 15.24, 15.32, Ap 15.11, Ro 5.6-10, 6.4-5, 6.13, 10.12, Ef 1.7, 2.1, 2.7, Kl 2.12-13    **2:6:** Ef 1.20, Kl 2.12    **2:7:** Ef 1.7

soim bikpela marimari tru bilong en long olgeta man long olgeta taim bihain. <sup>8</sup>Yupela i bilip long Krai, na long marimari bilong God tasol, God i kisim bek yupela. Dispela em i no samting yupela yet i mekim. Nogat. God i givim nating long yupela. <sup>9</sup>Em i no olsem pe bilong wok yupela i mekim. Olsem na i no gat wanpela man em inap litimapim nem bilong em yet. <sup>10</sup>Long Krai Jisas God i mekim yumi i kamap ol nupela manmeri, bilong yumi ken wokabaut long rot bilong gutpela pasin bipo yet God i redim pinis bilong yumi ken wokabaut long en.

*Krais i pinisim pasin birua na tupela lain i kamap wanpela*

<sup>11</sup>Yupela i save, ol lain bilong Juda i save katim skin bilong ol man, na ol i save kolim yupela olsem, “Ol man i no save katim skin.” Dispela i tok long pasin ol man yet i save mekim long skin bilong ol. Orait yupela i mas tingim gut, bipo yupela i stap man bilong ol arapela lain, <sup>12</sup>na long dispela taim yupela i stap longwe long Krai. Yupela i stap ausait long lain bilong Israel. God i bin mekim promis na i givim kontrak long ol lain Israel, na yupela i stap ausait long dispela lain. Yupela i stap long dispela graun, na i no gat wanpela gutpela samting i stap bilong yupela i wetim i kamap bihain. Na yupela i no save long

---

**2:8:** Jo 4.10, Ro 4.16, 10.14-17, Fl 1.29, 2 Ti 1.9, Hi 6.4    **2:9:** Ro 3.20, 3.27, 4.2, 1 Ko 1.29-31, 2 Ti 1.9    **2:10:** 1 Ko 3.9, 2 Ko 5.5, 5.17, Ef 4.24, Ta 2.14    **2:11:** Ro 2.28-29, 1 Ko 12.2, Ef 5.8, Kl 1.21    **2:12:** Ro 9.4, 9.8, Ga 4.8, Ef 4.18, Kl 1.21, 1 Te 4.5, 4.13

God. <sup>13</sup> Bipo yupela i stap longwe tru. Tasol nau blut bilong Krai i bringim yupela i kam, na yupela i pas wantaim Krai Jisas na yupela i stap klostu tru long God. <sup>14</sup> Krai yet i save mekim yumi i stap bel isi na sindaun gut wantaim. Bipo ol lain Juda i save birua long ol arapela lain, na dispela pasin birua i kamap olsem banis i stap namel long ol Juda na ol man bilong ol arapela lain. Tasol long bodi bilong em yet Krai i brukim pinis dispela banis na i pinisim dispela pasin birua, na em i bungim tupela lain na mekim ol i kamap wanpela lain tasol. <sup>15</sup> Em i rausim pinis lo bilong Moses wantaim olgeta hap tok na olgeta lo bilong en. Em i mekim olsem, bai em i ken bungim tupela lain na mekim ol i kamap olsem wanpela nupela man. Na long dispela pasin em i mekim yumi i stap wanbel. <sup>16</sup> Em i dai long diwai kros bilong bungim dispela tupela lain long wanpela bodi. Na long diwai kros em i kilim i dai dispela pasin birua i bin i stap bipo. <sup>17</sup> Em i kam na i autim gutnius olsem, “Nau yupela i stap wanbel.” Em i autim dispela gutnius long yupela ol lain i stap long ol longwe ples, na long ol manmeri i stap klostu tu. <sup>18</sup> Yumi stap wanbel, long wanem, long Krai yumi tupela lain wantaim i gat wanpela Spirit i opim rot bilong yumi ken kamap long Papa.

### *Yumi olgeta Kristen yumi haus tru bilong God*

---

**2:13:** Ga 3.28, Ef 2.17, Kl 1.20    **2:14:** Ais 9.6, Mai 5.5, Jo 16.33, Ap 10.36, 1 Ko 12.13, Kl 1.20, 2.14    **2:15:** 2 Ko 5.17, Ga 6.15, Ef 4.24, Kl 1.20-22, 2.14, 2.20    **2:16:** Sek 9.10, Ro 6.6, 8.3, Kl 1.20, 2.14    **2:17:** Ais 57.19, Sek 9.10, Ap 2.39, Ro 5.1    **2:18:** Ro 5.2, 1 Ko 12.13, Ef 3.12, Hi 4.16, 1 Pi 3.18



<sup>19</sup> Nau yupela i no moa i stap olsem ol tripman i no gat graun. Nogat. Yupela i wanlain wantaim ol manmeri bilong God. Yupela i stap lain tru bilong God. <sup>20</sup> Yupela i olsem haus God i wokim. Em i bin planim mipela aposel wantaim ol profet olsem pos bilong dispela haus. Na Krai Jisas em i namba wan pos tru. <sup>21</sup> Olgeta bun bilong dispela haus i pas long Krai, olsem na olgeta i pas gut wantaim. Na God i wokim yet dispela haus, na haus i laik kamap bikpela moa na i stap haus bilong Bikpela yet. <sup>22</sup> Yupela tu i pas long Krai, na God i bungim yupela wantaim ol arapela manmeri bilong en, na yupela i kamap haus tru bilong God, bai em wantaim Holi Spirit i ken i stap long dispela haus.

### 3

#### *Pol i gat wok bilong autim gutnius long ol arapela lain*

<sup>1</sup> God i mekim gut tru long yupela, na long dispela as tasol mi Pol mi stap long kalabus, long wanem, mi save mekim wok bilong Krai Jisas bilong helpim yupela man bilong ol arapela lain. <sup>2</sup> Mi ting yupela i harim pinis olsem, God i bin marimari long mi na makim mi bilong mekim dispela wok em i mekim bilong marimari long yupela tu. <sup>3</sup> Dispela tok long samting God i mekim, bipo em i stap hait, tasol God yet i bin kamapim long mi, olsem mi stori liklik pinis. <sup>4</sup> Na taim

---

**2:19:** Ga 6.10, Ef 3.6, Fl 3.20, Hi 12.22-23    **2:20:** Mt 16.18, 1 Ko 3.9-11, Ga 2.9, KTH 21.14    **2:21:** 1 Ko 3.16-17, 2 Ko 6.16, Ef 4.15-16, Kl 2.19    **2:22:** 1 Pi 2.5    **3:1:** Ef 4.1, Fl 1.7, 1.13, Fm 1.1, 9    **3:2:** Kl 1.25    **3:3:** Ef 1.9-10, Kl 1.26    **3:4:** Kl 1.26-27

yupela i ritim dispela tok, orait yupela bai i save olsem, mi save gut tru long dispela tok hait bilong wok Krai i mekim. <sup>5</sup> Long olgeta taim bipo, God i no bin autim klia dispela tok hait. Tasol nau long Holi Spirit, God i autim klia long mipela ol aposel na profet bilong em. <sup>6</sup> Dispela tok i olsem. Long gutnius yupela man bilong ol arapela lain yupela i kamap wanlain na wanpela bodi wantaim mipela. Na yumi olgeta i save kisim olgeta samting God i bin makim bilong yumi long Krai Jisas. <sup>7</sup> God i mekim mi i kamap wokman bilong autim dispela gutnius. Em i marimari long mi, na em i givim strong bilong en long mi, bilong strongim mi long mekim dispela wok. <sup>8</sup> Mi aninit tru long olgeta arapela manmeri bilong God, tasol em i marimari long mi na givim dispela wok long mi, em wok bilong autim gutnius long ol arapela lain. Dispela gutnius i tok long olgeta gutpela samting bilong Krai, em yumi ol man i no inap tru long skelim na kaunim. <sup>9</sup> God i bin wokim olgeta samting, na pastaim em i haitim tingting bilong en long olgeta pasin em i laik mekim. Na dispela tingting i stap hait long olgeta taim bipo. Tasol nau em i givim mi wok bilong autim klia dispela tingting bilong em. <sup>10</sup> Bipo em i haitim, tasol nau em i mekim sios bilong en i kamap, na long dispela pasin em i mekim ol kain kain gutpela tingting na save bilong en i kamap ples klia, bai ol strongpela ensel na spirit bilong heven i ken

---

**3:6:** Ga 3.14, 3.28-29, Ef 2.13-19    **3:7:** Kl 1.23-25    **3:8:** 1 Ko 15.9-10, Ga 1.16, Ef 1.7, Kl 1.27, 1 Ti 1.13-15    **3:9:** Ro 16.25, 1 Ko 2.7, Ef 1.9, Kl 1.16, 1.20, Hi 1.2    **3:10:** Ro 8.38, 11.33, Ef 1.21, 1 Pi 1.12

save long tingting bilong God. <sup>11</sup> Bipo yet God i tingting long mekim ol dispela samting, na nau long wok bilong Krai Jisas, Bikpela bilong yumi, em i mekim pinis. <sup>12</sup> Na yumi save bilip long Krai, na yumi no pret. Yumi save gut olsem, Krai em i rot bilong yumi kamap long God. <sup>13</sup> Olsem na mi tokim yupela nau, yupela i no ken tingting planti long dispela pen mi karim bilong helpim yupela, na bai bilip bilong yupela i slek. Nogat. Yupela i ken amamas long dispela samting i kamap, long wanem, em bai i helpim yupela long i stap gut wantaim God.

*Pol i prea long ol Efesus i ken i stap strong*

<sup>14</sup> Mi ting long ol dispela samting Papa i bin mekim na mi save brukim skru long en. <sup>15</sup> Em i Papa bilong olgeta lain i stap long heven na long graun, na em yet i givim nem long olgeta dispela lain. <sup>16</sup> Mi save brukim skru na prea olsem, Papa i bin makim ol planti gutpela gutpela samting tru bilong givim yupela, olsem na em i ken pulapim Holi Spirit bilong em long bel bilong yupela, na mekim yupela i stap strong tru. <sup>17</sup> Na long bilip bilong yupela, Krai i ken i stap long bel bilong yupela. Na pasin bilong laikim tru ol arapela, em i ken kamap strong tru insait long bel bilong yupela na mekim yupela i sanap strong, olsem graun i save holimpas rop bilong diwai na mekim diwai i sanap strong. <sup>18-19</sup> Olsem na yupela i ken kisim

---

**3:12:** Jo 14.6, Ro 5.2, Ef 2.18, Hi 4.16    **3:13:** Kl 1.24    **3:15:**  
 Ef 1.10, Fl 2.9-11    **3:16:** Ro 9.23, 2 Ko 4.16, Fl 4.19, Kl 1.11, 1.27  
**3:17:** Jo 14.23, Ef 2.22, Kl 1.23, 2.7    **3:18-19:** Jo 1.16, Ro 10.3,  
 10.11-12, Ef 1.18, 1.23, Kl 2.2, 2.9-10

strong wantaim olgeta manmeri bilong God, inap long yupela olgeta i ken save gut long pasin bilong Krai long laikim tru ol arapela, em i bikpela tru, na i go longpela moa, na i go antap tru, na i go daun moa. Yes, pasin bilong Krai long laikim tru ol arapela, em i winim olgeta save, tasol yupela i ken save tru long en. Na olgeta gutpela samting i pulap long God yet, ol i ken pulap long yupela tu.

<sup>20</sup> Strong bilong God yet i save wok long bel bilong yumi, na dispela strong i winim tru tingting bilong yumi. Olgeta samting yumi save askim God long mekim, ol i no inap tru long mak bilong strong bilong en. <sup>21</sup> Olsem na oltaim oltaim ol manmeri bilong sios i mas litimapim nem bilong God long nem bilong Krai Jisas, inap long olgeta taim bihain. I tru.

## **Yumi stap bodi bilong Krai na yumi mas bihainim ol pasin bilong God yet**

*(Sapta 4-6)*

### **4**

#### *Yumi Kristen yumi bodi bilong Krai*

<sup>1</sup> Mi Pol, mi stap long kalabus, long wanem, mi save mekim wok bilong Bikpela. Mi ting long God i bin singautim yupela long bihainim em tru, olsem na mi laik kirapim yupela long wokabaut stret long pasin em i laikim. <sup>2</sup> Yupela i mas i stap

---

**3:20:** Ro 16.25, 1 Ko 2.9, Kl 1.29      **3:21:** Ro 11.36, 16.27, Hi 13.21

**4:1:** Ef 3.1, Fl 1.27, Kl 1.10, 1 Te 2.12, Fm 1.1, 9      **4:2:** Ap 20.19,  
Ga 5.22-23, Kl 3.12-13

aninit tru long ol arapela Kristen na mekim pasin isi long ol. Yupela i no ken belhat kwik long ol long taim ol i rongim yupela. Yupela wan wan i mas givim bel bilong yupela long ol na karim hevi ol i givim yupela. <sup>3</sup> Holi Spirit em i givim yumi pasin bilong i stap wanbel, na dispela pasin em i olsem rop i pasim yumi na yumi stap wanlain. Olsem na yupela i mas hatwok long holimpas dispela pasin. <sup>4</sup> I gat wanpela bodi tasol, na i gat wanpela Holi Spirit tasol. Olsem tasol God i singautim yupela bilong wetim wanpela samting tasol, em long God i ken inapim tru ol gutpela samting em i laik mekim long yumi. <sup>5</sup> I gat wanpela Bikpela tasol, na wanpela pasin bilong bilip, na wanpela baptais tasol. <sup>6</sup> I gat wanpela God, em i Papa bilong yumi olgeta. Em i antap long olgeta manmeri, na em i wok namel long olgeta manmeri, na em i stap insait long olgeta manmeri.

<sup>7</sup> Krai i givim bikpela presen moa long yumi, na olsem tasol God i bin marimari moa yet long yumi olgeta wan wan. <sup>8</sup> Buk bilong God i tok olsem,

“Em i go antap tru,  
     na em i kisim bikpela lain kalabus  
         i go wantaim em.  
 Na em i givim ol presen  
     long ol man.”

<sup>9</sup> Na dispela tok “em i go antap” em i soim yumi olsem Krai i no i go antap tasol. Nogat. Pastaim

---

**4:3:** Kl 3.14-15   **4:4:** Ro 12.5, 1 Ko 12.4, 12.11-12, Ef 1.18, 2.16-18

**4:5:** Jo 10.16, 1 Ko 1.13, 2 Ko 11.4, Ga 3.27-28, Hi 6.6   **4:6:** Ro 11.36, 1 Ko 12.6   **4:7:** Ro 12.3, 12.6, 1 Ko 12.11   **4:8:** Sng 68.18, Kl 2.15   **4:9:** Jo 3.13

em i go daun insait long hap bilong graun i stap daunbilo tru.\* <sup>10</sup> Dispela man pastaim em i go daun, em i go antap tu. Em i go antap tru long olgeta heven, bilong em i ken pulapim olgeta samting. <sup>11</sup> Na em tasol i givim ol presen olsem. Long sampela man em i givim wok aposel. Na long sampela em i givim wok profet. Na long sampela em i givim wok bilong autim gutnius long ol manmeri. Na long sampela em i givim wok pasto na wok bilong skulim ol manmeri long ol pasin God i laikim. <sup>12</sup> Krai i givim ol dispela presen bilong helpim yumi manmeri bilong God bai yumi inap long mekim gutpela wok bilong em. Olsem na bai bodi bilong Krai i ken kamap strong na i stap gut. <sup>13</sup> Na dispela wok bai i go i go inap long yumi bilip tru na dispela i mekim yumi i stap wanbel tru, na yumi olgeta i save tru long Pikinini Bilong God. Olsem na Kristen laip bilong yumi bai i kamap strong na yumi bai kisim ol wankain gutpela pasin olsem Krasi yet. <sup>14</sup> Yumi bai i no inap i stap moa olsem ol liklik pikinini, na ol dispela tok bilong ol grisman i save tumas long olgeta pasin bilong trik na giaman, em bai i no inap sakim yumi nabaut olsem win na si i save sakim kanu long solwara, na kanu i trip nabaut na i no i go stret long ples em i makim. <sup>15</sup> Yumi no ken putim yau long ol dispela kain tok. Nogat. Yumi

---

\* **4:9:** Sampela saveman i save tanim dispela tok olsem, "Pastaim em i kam daun olgeta long dispela graun." **4:10:** Hi 4.14, 9.24  
**4:11:** Ro 12.7, 1 Ko 12.28, 2 Ti 4.5 **4:12:** 1 Ko 12.7, Ef 1.23, 2 Ti 3.17 **4:13:** 1 Ko 14.20, Kl 1.28, 2.2 **4:14:** Ais 28.9, 1 Ko 14.20, 2 Ko 2.17, Hi 13.9 **4:15:** Ef 1.22, 4.25, Kl 1.18, 1 Jo 3.18

mas bihainim pasin bilong laikim tru ol arapela na mekim tok tru tasol long ol. Olsem bai yumi kamap strongpela manmeri na bai yumi pas tru wantaim Krai, em i het bilong yumi, <sup>16</sup> na em i save mekim yumi olgeta han lek ai samting bilong bodi yumi mekim gut wok em i makim bilong yumi olgeta wan wan. Na em i save mekim yumi olgeta skru rop bun samting bilong bodi i pas gut wantaim na i bihainim pasin bilong laikim tru ol arapela, na long dispela pasin bodi i save kamap bikpela na strongpela.

*Ol Kristen i mas wokabaut long nupela pasin*

<sup>17</sup> Olsem na mi laik mekim wanpela tok long yupela. Long nem bilong Bikpela mi tokaut strong olsem, yupela i no ken wokabaut moa long pasin bilong ol haiden. Tingting bilong ol i paul olgeta, <sup>18</sup> na save bilong ol i olsem tudak. Ol i no gat save tru, na bel bilong ol i pas, olsem na ol i stap ausait long laip bilong God. <sup>19</sup> Ol i no save sem moa long pasin ol i save mekim. Ol i go insait tru long pasin nogut, na bel bilong ol i kirap tru long mekim ol kain kain pasin doti.

<sup>20-21</sup> Mi ting yupela i harim pinis tok bilong Krai, na ol i skulim yupela pinis long tok tru i stap long Jisas. Na mi save, ol i no bin skulim yupela long mekim ol dispela pasin nogut bilong ol haiden. <sup>22</sup> Bipo yupela tu i bin wokabaut long pasin bilong olupela man, em pasin bilong giaman na bel i kirap long mekim ol samting

---

**4:16:** Kl 2.19    **4:17:** Ro 1.21, 1 Pi 1.14    **4:18:** Ap 26.18, Ga 4.8, Ef 2.12, 1 Te 4.5    **4:19:** Kl 3.5    **4:22:** Ro 6.6, 8.13, Ef 2.2-3, 4.17, Kl 3.9, Hi 12.1, 1 Pi 4.3

nogut, na em pasin i bringim man i go long rot bilong bagarap. Tasol nau yupela i mas rausim dispela olupela pasin <sup>23</sup> na tingting bilong yupela i mas kamap nupela. <sup>24</sup> Yupela i mas kamap ol nupela manmeri, em ol manmeri God i mekim ol i kamap nupela na ol i stap olsem God yet, long wanem, pasin bilong ol i stretpela olgeta na i holi tru.

<sup>25</sup> Olsem na yupela i mas lusim pasin bilong giaman. Yupela olgeta i mas mekim tok tru tasol long ol arapela Kristen, long wanem, yumi olgeta i stap hap bilong wanpela bodi. <sup>26</sup> Sapos bel bilong yupela i hat, orait yupela lukaut. Nogut yupela i mekim sin. Nogut yupela i belhat yet i stap na san i go daun. <sup>27</sup> Nogut yupela i opim dua long Satan. <sup>28</sup> Ol stilman i no ken stil moa. Nogat. Nau ol i mas wok. Ol i mas mekim gutpela wok long han bilong ol yet, na ol bai i kisim planti samting, inap long ol i ken helpim ol man i sot long ol samting. <sup>29</sup> Yupela i no ken larim ol kain kain tok nogut i kamap long maus bilong yupela. Nogat. Gutpela tok tasol i mas kamap, inap long strongim ol man i slek. Dispela kain tok i save bringim marimari bilong God i kam long ol man i harim. <sup>30</sup> Yupela i no ken givim bel hevi long Holi Spirit bilong God. God i givim Holi Spirit long yupela olsem mak bilong yupela i stap ol manmeri bilong em stret, na bilong soim yupela olsem em i makim

---

**4:23:** Ro 12.2, Kl 3.10      **4:24:** Stt 1.26, Ro 6.4, Ef 2.10, Kl 3.10

**4:25:** Sek 8.16, Ro 12.5, Kl 3.8-9      **4:26:** Sng 4.4, Je 1.19-20

**4:27:** 2 Ko 2.10-11, Je 4.7, 1 Pi 5.9      **4:28:** 1 Te 4.11, 2 Te 3.8, 3.11-12

**4:29:** Ef 5.4, Kl 3.8, 3.16, 4.6, 1 Te 5.11      **4:30:** Ais 63.10, Ro 8.23, Ef 1.13-14, 1 Te 5.19



taim bilong kisim bek yupela na mekim yupela i kamap fri tru. <sup>31</sup> Yupela i mas rausim olgeta pasin bilong bel nogut na kros na belhat na bikmaus na tok bilas, na olgeta kain pasin nogut. <sup>32</sup> Yupela i mas mekim gutpela pasin long ol arapela Kristen na givim bel bilong yupela long ol. Yupela i mas lusim sin bilong ol, olsem God i lusim sin bilong yupela long nem bilong Krais.

## 5

### *Yumi mas wokabaut long lait*

<sup>1</sup> God i save laikim yupela tru, na yupela i stap pikinini bilong em. Olsem na yupela i mas bihainim ol pasin em yet i save mekim. <sup>2</sup> Yupela i mas wokabaut long pasin bilong laikim tru ol arapela, olsem Krais i bin laikim yumi tru na givim laip bilong em yet bilong helpim yumi. Em i givim laip bilong en long God olsem ofa i gat gutpela switpela smel.

<sup>3</sup> Yupela i no ken mekim pasin pamuk na olgeta kain pasin doti, na yupela i no ken mangalim ol samting bilong ol arapela. Tok bilong ol dispela pasin tu i no ken kamap liklik namel long yupela. I no inap yumi manmeri bilong God i toktok long ol dispela kain pasin. <sup>4</sup> Yupela i no ken mekim tok doti na tok kranki na tok pilai nogut. Dispela kain pasin em i no inap long yumi mekim. Nogat.

---

**4:31:** Kl 3.8, 3.18-19, Ta 3.2-3, 1 Pi 2.1    **4:32:** Mt 6.14, 18.22-35, Mk 11.25, 2 Ko 2.10, Kl 3.13    **5:1:** Mt 5.48, Lu 6.36    **5:2:** Kis 29.18, Wkp 1.9, Sng 40.6, Jo 13.34, Ro 14.15, 2 Ko 2.15, Ga 2.20, Hi 7.27, 10.10, 1 Jo 3.11, 3.23    **5:3:** Ro 6.13, 1 Ko 5.1, 2 Ko 12.21, Kl 3.5, 1 Te 4.3    **5:4:** Mt 12.35, Ro 1.28, Ef 4.29

Mobeta yupela i tok tenkyu long God. <sup>5</sup> Yupela i mas save gut olsem, ol manmeri bilong mekim pasin pamuk na olkain pasin doti, na ol manmeri bilong mangal, em wankain pasin olsem pasin bilong lotuim ol giaman god, ol dispela lain i no inap i kam insait long kingdom bilong Krai na God.

<sup>6</sup> Yupela i mas lukaut gut, nogut yupela i bihainim ol rabis toktok nating bilong ol man i laik pulim yupela i go mekim ol dispela pasin nogut. Em ol dispela kain pasin tasol i save mekim God i belhat long ol man bilong sakim tok bilong em.

<sup>7</sup> Olsem na yupela i no ken poroman wantaim ol dispela kain man. <sup>8</sup> Bipo yupela i stap long tudak, tasol nau Bikpela i putim yupela i stap long lait. Olsem na yupela i mas wokabaut olsem ol manmeri bilong lait. <sup>9</sup> Lait em i save kamapim olgeta kain gutpela pasin na stretpela pasin na pasin bilong tok tru. <sup>10</sup> Yupela i mas trai long kisim save long ol pasin Bikpela i save laikim.

<sup>11</sup> Yupela i no ken poroman wantaim ol man i save mekim pasin bilong tudak. Kain pasin olsem em i no save karim gutpela kaikai. Nogat. Mobeta yupela i mas soim ol man olsem, dispela kain pasin em i nogut. <sup>12</sup> Mi no ken tokaut long ol pasin ol i save hait na mekim. Nogat. Mi sem long toktok long ol dispela kain samting. <sup>13</sup> Tasol lait i save kamapim as bilong olgeta pasin na mekim ol i stap

---

**5:5:** 1 Ko 6.9-10, Ga 5.19-21, Kl 3.5      **5:6:** Ro 1.18, Kl 2.4, 2.8, 2 Te 2.3      **5:8:** Jo 12.36, Ap 26.18, Ro 1.21, 2 Ko 3.18, Ef 2.11-13, Kl 1.13, 1 Pi 2.9, 1 Jo 2.9      **5:9:** Ga 5.22      **5:10:** Ro 12.2, Fl 1.10, 1 Te 5.21, 1 Ti 2.3      **5:11:** Ro 6.21, 1 Ko 5.9-11, Ga 6.8, 2 Te 3.6, 3.14, 2 Jo 1.10-11      **5:13:** Jo 3.20-21, Hi 4.13

ples klia. <sup>14</sup> Na taim lait i mekim wanpela samting i stap ples klia, orait dispela samting tu i kamap olsem lait. Olsem na dispela tok i stap,  
 “Yu man nau yu slip, yu mas kirap.

Yu kirap long matmat  
 na Kraiss bai i givim lait  
 long yu.”

<sup>15</sup> Olsem na yupela i mas lukaut gut long wok-abaut bilong yupela. Yupela i no ken wokabaut olsem man i no gat save. Nogat. Yupela i mas wokabaut olsem man i gat save. <sup>16</sup> Nau yupela i gat taim bilong mekim pasin bilong God. Tasol dispela taim nau yumi stap long en, em i taim nogut, olsem na yupela i mas lukaut, nogut dispela taim i lus nating. <sup>17</sup> Yupela i no ken mekim ol kranki pasin. Nogat. Yupela i mas save gut long laik bilong Bikpela.

<sup>18</sup> Yupela i no ken dring planti na spak. Nogat. Dispela kain pasin i save bagarapim yupela. Yupela i mas larim Spirit bilong God i pulap long yupela. <sup>19</sup> Na taim yupela i toktok wantaim ol arapela manmeri bilong God, yupela i mas kisim ol tok i stap long ol song bilong Buk Song na long ol arapela song bilong lotu na long ol song Holi Spirit i kamapim long bel bilong yupela, na putim insait long tok bilong yupela. Na yupela i mas singim ol song long Bikpela, long maus na long bel bilong yupela tu. <sup>20</sup> Na oltaim yupela i mas givim

---

**5:14:** Ais 26.19, 60.1, Ro 13.11    **5:16:** Ga 6.10, Kl 4.5    **5:17:**  
 Ro 12.2, Kl 1.9, 1 Te 4.3, 5.18    **5:18:** Snd 20.1, Ais 5.11, 5.22, Lu  
 21.34    **5:19:** Sng 33.2-3, Ap 16.25, 1 Ko 14.26    **5:19:** Kl 3.16-17  
**5:20:** Sng 34.1, Ais 63.7, Hi 13.15, 1 Pi 2.5

tenkyu long God Papa long olgeta samting, long nem bilong Bikpela bilong yumi Jisas Kraiss.

*Pol i tok long ol manmeri i marit*

<sup>21</sup> Yupela i mas ting long Kraiss em i Bikpela bilong yupela, na yupela wan wan i mas i stap aninit long ol arapela manmeri bilong God.

<sup>22</sup> Yupela meri, yupela i mas aninit long ol man bilong yupela, olsem yupela i save aninit long Bikpela. <sup>23</sup> Long wanem, man em i het bilong meri bilong en, olsem Kraiss em i het bilong sios. Sios em i bodi bilong Kraiss, na Kraiss i bin kisim bek em. <sup>24</sup> Sios em i stap aninit long Kraiss. Olsem tasol yupela meri tu, oltaim yupela i mas aninit long ol man bilong yupela.

<sup>25</sup> Yupela man, yupela i mas laikim tumas ol meri bilong yupela, olsem Kraiss i laikim tumas sios na i givim laip bilong em yet bilong helpim sios. <sup>26</sup> Long wara na long tok bilong en, Kraiss i wasim sios na mekim em i kamap klin long ai bilong en. Long dispela pasin em i makim sios i bilong em yet. <sup>27</sup> Em i laik mekim sios i kamap naispela tru long ai bilong em, na bai sios i no gat doti na grille na kain samting olsem. Nogat. Sios i ken i stap holi na i no gat asua. <sup>28</sup> Olsem tasol yupela man, yupela i mas laikim tru ol meri bilong yupela, olsem yupela i save laikim bodi bilong yupela yet. Man i laikim tru meri bilong en, em i laikim tru em yet. <sup>29</sup> Yumi save, i no gat

---

**5:21:** Fl 2.3, 1 Pi 5.5      **5:22:** Stt 3.16, Ef 6.5, Kl 3.18, 1 Pi 3.1

**5:23:** 1 Ko 11.3, Ef 1.22-23, Kl 1.18      **5:25:** Ga 1.4, Kl 3.19, 1 Pi

3.7      **5:26:** Jo 15.3, 17.17, Ta 3.5, Hi 10.10, 10.22, 1 Jo 5.6      **5:27:**  
2 Ko 11.2, Ef 1.4, Kl 1.22

wanpela man i save birua long bodi bilong em yet. Nogat. Em i save givim kaikai long en na lukautim gut, olsem Krai i save mekim long sios, <sup>30</sup> long wanem, yumi olsem lek han na ai samting bilong bodi bilong Krai. <sup>31</sup> Buk bilong God i tok olsem, “Olsem na man i save lusim papamama na i pas wantaim meri bilong en, na tupela i kamap wanpela bodi tasol.” <sup>32</sup> Dispela tok hait em i gat bikpela tingting bilong en. Mi yet, mi ting em i tok long Krai wantaim sios bilong en. <sup>33</sup> Tasol dispela tok i tok tu long yupela man wan wan long yupela i mas laikim tru meri bilong yupela, olsem yupela i save laikim yupela yet. Na meri i mas i stap aninit long man bilong en na mekim gutpela pasin long em.

## 6

### *Pol i tok long ol pikinini na ol papamama*

<sup>1</sup> Yupela pikinini, yupela i mas bihainim tok bilong papamama bilong yupela. Yupela olgeta i pas wantaim Bikpela, na dispela pasin em i stret-pela pasin bilong yupela i mekim. <sup>2</sup> Buk bilong God i tok olsem, “Yu mas aninit long papamama bilong yu na bihainim tok bilong ol.” Dispela lo em i namba wan lo i gat promis i stap wantaim, <sup>3</sup> em promis i tok olsem, “Sapos yu mekim olsem, orait olgeta wok samting yu mekim i ken kamap gutpela, na bai yu stap longpela taim long dispela graun.”

---

**5:30:** Ro 12.5, 1 Ko 6.15, 12.27, Ef 1.22-23      **5:31:** Stt 2.24, Mt 19.5, Mk 10.7-8, 1 Ko 6.16      **5:32:** Kl 3.19, 1 Pi 3.6, KTH 19.7      **6:1:** Snd 23.22, Kl 3.20      **6:2:** Mt 15.4      **6:2:** Kis 20.12, Lo 5.16

<sup>4</sup> Na yupela papa, yupela i no ken bagarapim tingting bilong ol pikinini bilong yupela na mekim ol i belhat long yupela. Nogat. Yupela i mas mekim gutpela pasin long ai bilong Bikpela, na stretim gut ol pikinini bilong yupela na skulim ol long tok bilong Bikpela.

*Pol i tok long ol wokboi na ol bosman*

<sup>5</sup> Yupela ol wokboi nating, yupela i mas aninit long ol bosman bilong yupela, na yupela i mas pret tru, nogut yupela i mekim pasin i no stret long ai bilong ol. Oltaim yupela i mas tingting strong long mekim gutpela wok tasol, long wankain pasin olsem yupela i save mekim long taim yupela i mekim wok bilong Krai. <sup>6</sup> Nogut yupela i ting long grisim ol na yupela i mekim gutpela wok long taim ol i stap klostu tasol. Nogat. Yupela i mas ting olsem yupela i stap wokboi nating bilong Krai yet, na bel bilong yupela i mas amamas long bihainim laik bilong God. <sup>7</sup> Olsem na yupela i mas belgut na mekim wok. I no olsem yupela i mekim wok bilong ol man. Nogat. Yupela i mekim wok bilong Bikpela yet. <sup>8</sup> Tingim. Sapos wanpela man i mekim gutpela wok, orait Bikpela bai i givim gutpela pe long em, maski dispela man em i wokboi nating o em i stap fri.

<sup>9</sup> Na yupela ol bosman, yupela tu i mas mekim gutpela pasin long ol wokboi nating bilong yupela. Yupela i mas lusim pasin bilong pretim ol. Bikpela i stap long heven, em i Bikpela bilong yupela na

---

**6:4:** Lo 4.9, 6.7, 6.20-25, Sng 78.4, Snd 19.18, 22.6, Kl 3.21    **6:5:** 2 Ko 7.15, Fl 2.12, Ta 2.9-10, 1 Pi 2.18    **6:5:** Kl 3.22-25    **6:8:** 2 Ko 5.10, Ga 3.28, Kl 3.11    **6:9:** Lo 10.17, Ro 2.11, Kl 3.25, 4.1

bilang ol tu, na em i save skelim pasin bilang olgeta manmeri long wankain pasin tasol.

*Ol Kristen i stap olsem ol soldia*

<sup>10</sup> Orait nau mi laik pinisim tok bilang mi olsem, yupela i pas wantaim Bikpela, olsem na yupela i mas tingting long olgeta bikpela strong bilang en, na yupela i mas sanap strong. <sup>11</sup> Yupela i mas pasim olgeta klos pait God i save givim long yumi, na bai yupela inap long sanap strong na sakim olgeta kain pasin bilang trik na giaman Satan i save hait na mekim. <sup>12</sup> Tingim gut. Yumi no save pait long ol manmeri. Nogat. Yumi pait long ol strongpela spirit na ol gavman na ol kain kain samting i gat strong, ol i save bosim graun long dispela taim bilang tudak. Yumi pait long olgeta spirit nogut i stap antap. <sup>13</sup> Olsem na yupela i mas kisim olgeta klos pait God i save givim yupela, na long taim nogut yupela bai inap sanap strong long pait. Na long taim pait i pinis, yupela bai i sanap strong i stap yet.

<sup>14</sup> Sapos yupela i laik sanap strong, orait yupela i mas pasim tok tru olsem let bilang yupela, na pasim stretpela pasin olsem siot kapa i karamapim bros bilang yupela, <sup>15</sup> na yupela i mas redi long autim gutnius bilang God i laik wanbel wantaim ol manmeri, na putim dispela pasin olsem su bilang yupela. <sup>16</sup> Yupela i mas kisim

---

**6:10:** 1 Ko 16.13, Ef 1.19, 3.16, Kl 1.11    **6:11:** Ro 13.12, 2 Ko 6.7, 10.4, Ef 4.14, 1 Te 5.8    **6:12:** Jo 12.31, 14.30, Ro 8.38, 1 Ko 15.50, Kl 2.15, 1 Pi 5.8-9    **6:13:** 2 Ko 10.4, Ef 5.16    **6:14:** Ais 11.5, 59.17, 2 Ko 6.7, 1 Te 5.8    **6:15:** Ais 40.9, 52.7, Nah 1.15, Ro 10.15    **6:16:** 1 Jo 5.4

dispela olgeta samting bilong pait, na yupela i mas kisim tu pasin bilong bilip, na holim strong olsem hap plang, bai yupela inap long mekim i dai olgeta spia paia dispela man nogut Satan i save sutim i kam long yupela. <sup>17</sup> Yupela i mas tingting long God i kisim bek yupela pinis, na dispela tingting i mas i stap olsem hat kapa yupela i putim. Na yupela i mas holim bainat bilong Holi Spirit, em tok bilong God. <sup>18</sup> Long strong bilong Holi Spirit yupela i mas prea oltaim. Yupela i mas strong long mekim ol kain kain beten na askim God long helpim yupela. Oltaim yupela i mas was gut bai yupela i no lusim dispela pasin. Yupela i no ken malolo. Oltaim yupela i mas prea na askim God long helpim olgeta manmeri bilong en. <sup>19</sup> Na yupela i mas askim God long helpim mi tu. Mi laik bai yupela i prea olsem, God i ken putim tok long maus bilong mi, na mi ken daunim pret na autim tru tok hait bilong gutnius. <sup>20</sup> God yet i bin salim mi i go bilong autim dispela gutnius, na long dispela as tasol mi stap long kalabus. Mi gat wok bilong autim gutnius, olsem na yupela i mas prea long God i ken strongim mi, bai mi ken daunim pret na tokaut strong long ol manmeri.

*Pol i askim God long mekim gut long ol*

<sup>21</sup> Tikikus bai i toksave long yupela long olgeta wok mi mekim. Tikikus em i brata tru bilong yumi, na em i gutpela wokman tru bilong Bikpela.

---

**6:17:** Ais 49.2, 59.17, 1 Te 5.8, Hi 4.12, KTH 19.15    **6:18:** Mt 26.41, Lu 18.1, Ro 12.12, Kl 4.2, 1 Te 5.17, 1 Ti 2.1    **6:19:** Ap 4.29, 2 Ko 3.12, Kl 4.3-4, 2 Te 3.1    **6:20:** 2 Ko 5.20, Fl 1.20, Fm 1.9-10  
**6:21:** Ap 20.4, Kl 4.7-8, 2 Ti 4.12, Ta 3.12    **6:21:** Kl 4.7-8



<sup>22</sup> Mi salim em i kam long yupela bai yupela i ken save, mipela i stap olsem wanem, na bai em i ken strongim bel bilong yupela.

<sup>23</sup> God Papa wantaim Bikpela Jisas Krais em i ken mekim isi bel bilong yupela olgeta brata, na em i ken mekim yupela i bilip strong na i laikim tru ol arapela. <sup>24</sup> God i ken mekim pasin bilong marimari long olgeta man i no save lusim pasin bilong laikim tru Bikpela bilong yumi Jisas Krais.

**Buk Baibel long Tok Pisin**  
**The Holy Bible with Deuterocanon in the Tok Pisin**  
**(Melanesian Pidgin) Language of Papua New Guinea**  
**Buk Baibel long Tok Pisin bilong Niugini**

Copyright © 1969–2008 The Bible Society of Papua New Guinea

© Faith Comes by Hearing

Language: Tok Pisin (Melanesian Pidgin)

Translation by: The Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-01

---

PDF generated using Haiola and XeLaTeX on 4 Mar 2023 from source files dated 15 Jul 2022

5c0c4a4f-dad2-5d97-a0e2-3798fa9dafbd